

國朝耆獻類徵初編卷二百六十一目錄

將帥一

費英東

子索海

圖賴

扈爾漢

額亦都

子圖爾格

伊爾登

安費揚古

孫都爾德
曾孫馬錫泰

遜塔

國朝耆獻類徵初編卷二百六十一

通奉大夫前署江西巡撫江西布政使司布政使湘陰李桓輯

將帥一

費英東

子索海

圖賴

費英東姓瓜爾佳氏世居蘇完後隸滿洲鑲黃旗驍果善射引強弓十餘石太祖高皇帝勦業之初隨其父蘇完部長索爾果首率所部軍民五百戶來歸太祖嘉之授一等大臣尙主有兒沁巴顏者費英東女兄之夫也謀逆費英東擒而誅之初征瓦爾喀部取噶嘉路殺部長阿球降其眾以歸戊戌年正月同台吉褚英等統兵千人再征瓦爾喀取安楚拉庫路圍屯寨二十餘所屬人

戶悉招降之丁未年正月蜚悠城長苦烏拉侵擾請內附費英東同貝勒舒爾哈齊等遷之盡收其環城屯寨令侍衛扈爾漢護五百戶先歸烏拉以兵追擊相持未下費英東率師繼至大敗之五月討東海渥集部與貝勒色雅喇等取赫席赫路鄂摩和蘇魯路佛訥赫託克索路俘二千人而還辛亥年七月同台吉阿巴泰等取烏爾固辰穆稜二路癸丑年正月從太祖征烏拉同諸貝勒大臣力戰破敵乘勝奪門遂拔其城尋命與何和哩額亦都扈爾漢安費揚古爲五大臣佐理國事天命四年二月明兵四路來侵一軍據薩爾滸山巔費英東率本旗兵進擊破之太祖之征明取撫順也明兵來援礮驚費英東馬旁逸諸軍不前費英東迴

馬大呼揮諸軍並進遂破之 太祖拊髀歎曰萬人敵也從攻葉赫城上矢石雨下 太祖命之退對曰我兵已薄城下矣再命之退對曰勢垂克必不退竟拔其城費英東自少從 太祖征討諸國三十餘年身先兵士衝突堅陣當其鋒者莫不披靡性忠直遇事敢言毅然不撓以功授三等子世襲五年三月卒年五十有七 太祖聞之哀慟親臨其喪 太宗文皇帝天聰六年追封直義公配享 太廟八年以其子察喀尼襲爵 賜勳免死二次 太宗嘗諭羣臣曰費英東見人不善必先自斥責而後劾人見人之善必先自獎勸而後舉之被劾者無怨言被舉者亦無驕色朕未聞諸臣以善惡直奏似斯人也順治十六年 世祖章皇帝念

佐命勳臣 詔晉費英東世爵爲三等公康熙九年 聖祖仁皇帝御製碑文勒石紀勳雍正九年 世宗憲皇帝加封號曰信勇乾隆四十三年 上追念費英東忠勳晉世爵爲一等公子十人察喀尼見大臣表第六子索海第七子圖賴別有傳

右 國史館本傳

國初 太祖時以瓜爾佳信勇直義公費英東鈕祜祿宏毅公額亦都棟鄂溫順公何和哩 賜姓覺羅忠烈公扈爾漢覺爾察敏壯公安費揚古爲五大臣凡軍國重務皆命贊決焉

國初甫定遼瀋官職悉沿明制其總攝國政者有五大臣其餘設總兵副將遊擊備禦之分而皆階以等級如一二三等總兵官其一二三等遊擊之類

後改爲國語無復漢名

如固山額
眞之類

入關後始改總統旗務者爲都

統每旗一員其參協者爲副都統每旗二員其下設參領佐領等

官惟世職名仍沿國語

如一二三等阿思尼哈番一
二三等拜他拉布勒哈番之類

乾隆初從舒

文襄公始設漢銜其一品者爲子二品者爲男三品者爲輕車都尉四品者爲騎都尉五品者爲雲騎尉而官名乃釐正焉

右錄宗室昭棟撰

索海

索海滿洲鑲黃旗人姓瓜爾佳氏費英東第六子也天聰五年七月初設六部官授刑部承政七年八月同兵部承政車爾格至錦州偵明邊隘斬獲有功命兼佐領崇德三年二月明石城島總

兵沈志祥挈所屬來歸索海隨貝勒杜度等運米濟之七月更定
部院官制改授都察院左參政統兵往大凌河兩岸十四屯堡略
地還復任刑部承政明年十二月同工部承政薩木什喀往征索
倫部索海率右翼兵偵知掛刺爾屯有敵兵五百與理事官喀喀
木等輕騎襲之奪其柵斬二百級擒百三十人及左翼薩穆什喀
攻陷雅克薩賊旋攻鐸陳城不下而還烏喇與兀魯蘇屯之博穆
博果爾合兵六千襲其後索海率眾設伏衝擊之獲其輜重生擒
四百人乘勝往攻博穆博果爾營馳馬直入敵眾大潰是役也先
獲二千二百五十四人後至額蘇里屯以西額爾圖屯以東又獲
男婦五千餘牛羊駝馬無算凱旋太宗親率諸王郊迎宴勞之

敘功授二等輕車都尉世職部議索海出征索倫不豎立營寨嚴
東士卒以致疎脫俘囚應罰贖追還賞資上以索海功罪相抵
特詔免之明年三月隨睿親王多爾袞等圍明錦州坐阿附王貝
勒私遣官兵歸家離城遠駐罪論褫職籍沒後得旨寬免仍輸
罰贖六月王貝勒等統軍再圍錦州索海以兵四百截敵出城路
還遇錦州出汲小凌河兵三百邀擊之斬九十餘級又從攻松山
兵克之墜馬乘廝卒騎而歸會敏惠恭和元妃喪索海坐召優
人歌舞論罪免死削職分奴僕一半給其弟護軍統領圖賴且
諭曰爾既耽於逸樂任爾居家可也順治二年署副都統從征四
川卒於軍子多煩羅太宗文皇帝時授佐領順治元年以入關

國朝耆獻類徵初編 卷一百六十一
從破流賊功授騎都尉世職尋任都察院理事官九年八月加一等輕車都尉任蒙古副都統十四年十二月隨信郡王多尼進征黔真至雲南磨盤山爭先擊敵遂沒於陣 賜祭葬子多禪襲職

右 國史館本傳

圖賴

圖賴姓瓜爾佳氏費英東第七子也先隸鑲黃旗後與兄納蓋弟蘇完顏改撥正黃旗天聰初隨征董夔追擊察哈爾及攻明甯遠所至有功三年從 太宗文皇帝伐明進兵燕京其大同總兵滿桂以師赴援圖賴直前衝擊斬殺甚眾授騎都尉世職四年隨大貝勒阿敏等鎮守永平明監軍道張春等圍灤州圖賴與副都統

阿山等率護軍自永平馳至乘夜擊敗之師還大貝勒阿敏棄永平出邊明將率步卒百人已追及圖賴率十六人還戰進殲其眾尋授三等輕車都尉五年八月從征大凌河圍其城 太宗指授方略令與護軍統領南褚立兩旗之間遇逐我樵採者邀擊之又明兵誘戰圖賴先馳入陣諸軍各進戰圖賴被創 上以其違命輕進切責之九月明發兵四萬餘來戰圖賴統右翼兵躍馬衝陣敵兵潰走遂擒張春旋征大同拔靈邱縣及小石城敘功晉二等六年大軍破走察哈爾遂移師征明次於布里度圖賴奉 命同參領蘇喇達齋 敕諭明沙河堡守將明人遣兵齎牛酒幣帛以獻七年隨貝勒岳託等攻取旅順口統兵守旅順口偕漢軍遊擊

修圖賴明年從攻朔州以越界出略又不至期會地盡奪所獲物
入官九年任護軍統領隨貝勒多鐸入廣甯同都統阿山等率兵
四百先趨錦州明總兵祖大壽遣其將合松山兵三千餘人來禦
未及戰明兵驚潰我兵分路勦擊俘獲無算軍還敘功得優賞
崇德二年授爲議政大臣明年復隨貝勒岳託征明率師先驅踰
牆子嶺攻克十一臺進兵山東明將合步騎八千餘來禦正紅旗
隨營蒙古阿藍泰旁卻圖賴方營部馳擊敵以百騎突至圖賴搏
戰陷堅大敗之旋與都統譚泰敗明閣部劉宇亮等兵於通州河
上攻拔二城又分兵略地取二城累功晉爵三等男六年圍錦州
明兵自杏山赴援擊敗之先是蒙古有降明者曰諾木齊在圍中

遣人約獻東關以降至是明兵覺圍諾木齊家圖賴登城力戰殺敵出諾木齊以歸復破松山騎兵指揮漢軍拔塔山杏山二城晉一等男部議錦州之役諸貝勒所屬三旗護軍有退怯不戰者貝勒大臣未經察治圖賴坐附和徇隱論罪罰贖得旨寬免八年攻拔中後所及前屯衛晉三等子順治元年大軍至山海關流賊李自成遣兵拒戰圖賴率前鋒軍破賊將唐通於一片石既入關破自成兵復會大軍追敗之於望都縣超授三等公是年十月豫親王多鐸帥師下河南自成走陝西圖賴至孟津率精兵先渡河明守將黃士欣等各遁去瀕河十五寨堡兵民望風歸附睢州總兵許定國等率眾來降進薄潼關賊遣僞侯劉宗閔沿山列陣以

拒圖賴以騎兵百四十人進戰一以當百設伏掩擊盡殪之明年賊將劉方亮整兵千餘來窺我營圖賴與護軍統領阿濟格尼堪等率正黃鑲白正紅鑲紅鑲藍五旗將領迎擊賊懼而奔俘獲甚眾自成聞敗集兵拒敵圖賴復率鑲黃正藍正白三旗兵力戰殲其步卒餘騎奔竄賊糾眾又至連戰敗之遂破潼關賊眾大潰遁走陝西既定移兵收江南攻克揚州獲明閹部史可法斬之追福王朱由崧於蕪湖據江口截擊靖南伯黃得功兵敗之得功中流矢死遂獲由崧餘眾悉降師旋進爵一等公圖賴嘗謂睿親王多爾袞曰圖賴自誓於天效忠主上不避諸王貝勒大臣嫌怨久矣圖賴有過王若不言將恐不免於罪戾我欲改過自新王幸毋

姑息不我教誡也會睿親王於午門集議譚泰擅隱 諭旨罪三
日議未定圖賴面詰之曰何爲遲久不結耶聲色俱厲王怒曰爾
曩追流賊至望都分兵前進諸將爭先爾於肅豫諸王前誚讓且
唾逞威自恣今又以言詞偏我我固不能堪此怒色疾聲也遂去
諸王執圖賴將罪之王曰雖然此非退有後言比且爲國效勤矢
忠無他咎也解其縛而釋之三年任本旗滿洲都統隨端重親王
博洛進師浙閩軍次杭州時明魯王朱以海據紹興其總兵方國
安等營於錢塘江東岸艤舟以拒圖賴率諸將士從上流浮渡江
廣十餘里人馬無溺者分兵縱擊之國安驚以爲神盡棄戰艦攜
魯王遁保台州圖賴奮力追勦拔金華衢州各城會端重親王令

與都統漢岱分兵進取福建圖賴自衢州統所部兵擊敗明閣部
黃鳴駿於仙霞關攻克浦城漢岱亦自廣信破分水關入崇安明
唐王朱聿鍵遁走汀州諸將乘勝追擊擒斬聿鍵等五人及其總
兵等官盡降其眾閩海悉平回次金華病卒年四十七子輝塞襲
爵圖賴既卒之後二年貝子吞齊等誣告圖賴黨徇肅親王鄭親
王又與譚泰等私相盟誓睿親王追論之奪輝塞爵并沒其家

世祖章皇帝親政知圖賴無辜且念舊功追諡昭勳配享太

廟 賜文勒石復輝塞一等公還其資產雍正九年加號曰雄勇

右 國史館本傳

嘗讀孫徵君夏峯集中孫高陽相公行狀載崇禎庚午收復永平